

Sepp Maier

Gedicht zum 25. Steirischen Museumstag in Leoben

Z'erscht a herzlich's Grüaß enk Gott
damit oll's sei Urdnung hot.
Da heutige Steirische Museumstog
der wird groß gfeiert, gor koa Frog,
wal's mit 25 Johr jo gwiß,
schon a schön's Jubiläum is.

Museums gibt's, des is bekonnt,
jo Dutzende im Steirerlond.
Grod nur a poar führ' ih hiaz aon,
wal ih net olli aufzähl'n kaonn:
Sou a Museum birgt an Schotz,
wal do hobm drinnan Sochn Plotz,
de wos vor mehr ols hundert Johrn
für jedn gang und gäbe worn.

Wanns d' des olls siahgst, wirst vül begreifn.
In Scheifling find'st sechshundert Pfeifn!
Jo frahlih, unter d' Leit, lous her,
do gibt's gonz sicher a poar mehr!

Im Diözesanmuseum, gwiß
siahgst durt die haligi Kümmernis
und de hot fost, sou denk ich heit,
mit Conchita Wurst a Ähnlihkeit!

Bergbaumuseum Fohnsdorf nouh,
Blosmusimuseum souwiesou.
Holzmuseum an an Ort,
Museum für Militärluftfohrt,
durt wern, des follt ma hiatzn ein,
bold d' Eurofighter drinnansteihn!

Im Freilichtmuseum Stübing gor
a Schulklaß', wia sie früahrer wor.
Kindheitserinnerungen werdn woch,
wann ich do mein' Rundgong moch.
A Trödlerlodn is zan sehgn,
is Kastner & Öhler nix dagegn!

Donn a „Begehbor's Bilderbuach“
im Feistritztol, brauchst guati Schuach!
Sanitärmuseum net vergessn,
Closchüsseln gibt's durt, etla Größn!

Auf nouh wos B'sonder's zoag ih hin:
In Edelsboch, die Weltmaschin'!
Ins Kriminalmuseum muaß dih traun.
In Graz kaonnst Keuschheitsgürtl-schaun!
Und Sensnhämmer, Feuerwehr
und Curmuseum, lous na her.
Krampusmuseum, is koa Scherz.
Donn's Postmuseum Eisenerz.
In Vordernberg is Radwerk durt!

Mei, sou gangerts Stundn furt.
Kammerhofmuseum is bekonnt,
Brauchtum im Ausseerland.

A Hochzeitsmuseum gibt's bei Strodn
und des aonschaun kaonn net schodn,
obwuhl jo heit, des sog ich ah,
a Scheidungsmuseum g'scheiter wa!
Vül Lustiges, des sog ich glei.
Nochdenkliches is ah dabei!
In Müzzuschlog obm die Draisinen!
Des worn hiatz nur a poar Rosinen,
wal do gaberts nouh sou vül,
des wos ih gor net aufzähl'n wüll!

Orbeit und Fleiß, des sog ich schaon,
hängt ba dem „Sochn-z'somm'trog'n! draon,
dass d' Jugend woäß, wias glebt hobm, d' Oltn!
Nur kost'ts vül Müah, des zu erholten!
Drum ghört er gfeiert, gor koa Frog,
Da „Steirische Museumstog“!
Und do drauf wulln ma weiterbaun
und positiv in d' Zukunft schaun.